



Ikiyamakuru k'imihindagurikire y'ikirere N°33, kigenewe abahinzi- borozi, igice cya gatatu Ugushyingo (21- 30), 2020

Cyasohotse ku itariki ya 03 Ukuboza 2020

Incamate


Mu minsi icumi y'igice cya gatatu, Ugushyingo 2020 kuva tariki ya 21 kugeza tariki ya 30, byagaragaye ko isangano ry'imiyaga rikiri mu karere u Rwanda ruherereyemo, ibi byatumye imvura iboneka ahenshi mu gihugu. Imvura iri mukigereranyo ndetse no hejuru y'ikigereranyo cy'impuzandengo y'imvura isanzwe igwa yapimwe ahenshi mu gihugu nubwo hari nahapimwe imvura nke ugereranyije nisanzwe igwa. Igiteranyo cy'imvura nyinshi yapimwe mu Ntara y'Iburengerazuba mu karere ka Nyamasheke ku bupimiro bwa Karama-Kirimbi ahapimwe milimetero 94.7 mu minsi itanu, no ku bupimiro bwa Ntendezi nabwo hapimwe milimetero 89.2 mu minsi icyenda naho ku bupimiro bwa Kawangire mu Ntara y'Iburasirzuba hapimwe milimetero 81.3 mu minsi irindwi. Imvura nke iri muri muni ya milimetero 20 yapimwe ku bupimiro bwa Ruhuha mu Ntara y'Iburasirzuba hapimwe milimetero 19.9. Ibipimo by'ubushyuhe ni nk'ibisanzwe mu gice cya gatatu cy'Ugushyingo, aho igipimo cy'ubushyuhe bwo hejuru cyari hagati ya dogere Selisiyusi (°C) 19.7 ku bupimiro bwa Kinigi ndetse na dogere Selisiyusi 30.0 muri Rusizi ku bupimiro bwa Bugarama naho igipimo cy'ubushyuhe bwo hasi cyari hagati ya 10.8°C muri Musanze ku bupimiro bwo ku Kibuga cy'Indege cya Musanze na 18.3°C ku bupimiro bwa Bugarama.

1.0. Imvura yaguye

Aha turerekana ingano y'imvura yaguye, umubare w'iminsi imvura yaguye n'ubuhehere bw'ubutaka mu minsi icumi y'igice cya gatatu cy'Ugushyingo 2020.

1.1. Ingano y'imvura yaguye


Ikarita ya mbere hasi irerekana ingano y'imvura yaguye mu minsi icumi y'igice cya gatatu cy'Ugushyingo 2020. Muri iki gice imvura yapimwe yari iri mukigereranyo ndetse no hejuru y'ikigereranyo cy'impuzandengo y'imvura isanzwe igwa ahenshi mu gihugu nubwo hanwe na hamwe mu gihugu hapimwe imvura nke.



Ikarita ya 1: Ingano y'Imvura yaguye mu gice cya gatatu cy'Ugushyingo 2020

1.2 Impuzandengo y'imvura isanzwe igwa mu minsi icumi y'igice cya gatatu cy'Ugushyingo

Ufatiye ku bipimo by'igihe kirekire, ikarita ya kabiri iratwereka imvura isanzwe igwa mu minsi icumi y'igice cya gatatu cy'Ugushyingo. Ubusanzwe iki gice kigusha imvura iri hagati ya milimetero 28.6 na milimetero 84.5; bigaragara ko ugereranyije imvura yaguye n'isanzwe igwa mu gihe kirekire, muri iyi minsi icumi imvura yabaye nyinshi mu bice byinshi by'igihugu cyane cyane mu Ntara y'Iburengerazuba ndetse n'iy'Iburasirazuba.




Ikarita ya 2: Imvura isanzwe igwa mu gice cya gatatu cy'ukwezi k' Ugushyingo

1.3. Umubare w' iminsi imvura yaguyemo

Ikarita ya 3 iragaragaza umubare w'iminsi imvura yaguyemo, mu gice cya mbere mu kwezi k'Ugushyingo 2020. Umunsi tubara ko wagushije imvura ni uwapimweho byibuze milimetero 0.85 cyangwa nyinshi.

Muri iki gice nibura ahantu henshi hagushije imvura hagati y'iminsi itatu n'iminsi icyenda (3-9). Imvura yaguye neza mu gihugu hose, yarihagije kugira ngo ibihingwa bikenera imvura bikure neza. Mu gice cya mbere mu kwezi k'Ukuboza hateganyijwe ko iminsi imvura izagwa iri hagati y'iminsi ibiri (2) n'iminsi itanu (5).



Ikarita ya 3: Umubare w'iminsi imvura yaguyemo

1.4 Ubuhehere bw'Ubutaka

Aha turagaragaza muri rusange uko ubuhehere bw'ubutaka bwari bumeze. Ahenshi mu gihugu ubuhehere bw'ubutaka muri iyi minsi icumi y'igice cya gatatu cy'Ukuboza 2020 bwari mu kigereranyo gisanzwe bitewe n'ibihe by'imvura ndetse n'ibicu byiganje byaranze iyi minsi. Hateganyijwe ko ubuhehere bw'ubutaka buzakomeza kuba bwiza mu gice cya mbere cy'Ukuboza.


2.0. Iyipimo by'ubushyuhe

Aha turareba muri rusange uko ibipimo by'ubushyuhe bwo hejuru no hasi hirya no hino mu gihugu byari bimeze.

2.1 Iyipimo cy'ubushyuhe bwo hejuru

Ikarita ya 4 irerekana ubushyuhe bwo hejuru. Ugendeye ku bipimo by'ubushyuhe dusanzwe dupima, ahenshi mu gihugu ubushyuhe bwari mu kigereranyo cy'impuzandengo y'igihe kirekire, mu Ntara y'Iburasirazuba, mu Mujyi wa Kigali, ndetse n'igice kinini cy'Iburengerazuba cyane cyane mu Majyepfo yaho niho hashyushye kurusha ahandi. Mu Ntara y'Amajyaruguru, y'Iburengerazuba akaba ariho hakonje ugereranyije n'ahandi mu gihugu.


Ibipimo by'ubushyuhe byari hagati ya dogere Selisiyusi 19.7 na 27.5 ahenshi mu gihugu, uretse ku bupimiro bwa Bugarama hashyushye cyane hapimwe dogere selisiyusi 30.0



Ikarita ya 4: Ubushyuhe bwo hejuru

2.2. Igipimo cy'ubushyuhe bwo hasi

Ikarita ya gatanu irerekana uko ubushyuhe bwo hasi bwanganaga. Ubushyuhe bwo hasi bwari hagati ya dogere Selisiyusi 10.8⁰C (Ku kibuga cyindege cya Musanze) na dogere Selisiyusi 18.3⁰C ku bupimiro bwa Bugarama. Mu Majyaruguru y' u Rwanda niho hakonje cyane kurusha ahandi mu gihugu.



Ikarita ya 5: Ubushyuhe bwo hasi

3.0 Iteganyagihe rigenewe abahinzi mu minsi icumi y'igice cya mbere cy'Ukuboza (tariki 01-10) 2020

3.1 Ikirere giteganyijwe

Mu gice cya mbere cy'ukwezi k'Ukuboza 2020 (hagati y'italiki ya 1 n'ya 10) mu Rwanda hateganyijwe imvura iri hagati ya milimetero 20 na 120 izagwa mu buryo bukurikira:

Intara y'Iburasirazuba: Hateganyijwe imvura iri hagati ya milimetero 20 na 80. Mu majyaruguru ya Nyagatare, amajyepfo y'Iburasirazuba bwa Gatsibo, mu burengerazuba bwa Kayonza na Ngoma no mu gice kinini cya Bugesera na Rwamagana hateganyijwe imvura iri hagati ya milimetero 20 na 40. Mu karere ka Kirehe no mu burasirazuba bwa Kayonza, Gatsibo ndetse n'igice gito cy'amajyepfo y'iburasirazuba bw'Akarere ka Nyagatare hateganyijwe imvura iri hagati ya milimetero 60 na 80. Ahandi hasigaye hateganyijwe hagati ya milimetero 40 na 60.


Umujyi wa Kigali: Mu burasirazuba bwa Gasabo n'Akarere ka Kicukiro hateganyijwe imvura iri hagati ya milimetero 20 na 40 mu gihe muri Nyarugenge no mu burengerazuba bwa Gasabo hateganyijwe imvura iri hagati ya milimetero 40 na 60.

Intara y'Amajyepfo: Mu burasirazuba bw'Akarere ka Kamonyi hateganyijwe imvura iri hagati ya milimetero 40 na 60 mu gihe mu karere ka Nyaruguru hamwe n'amajyepfo ya Nyamagabe, Huye na Gisagara hateganyijwe imvura iri hagati ya milimetero 100 na 120 naho ahandi hasigaye hateganyijwe imvura iri hagati ya milimetero 60 na 100.

Intara y'Iburengerazuba: Igice kinini cy'Akarere ka Rusizi na Nyamasheke hateganyijwe imvura iri hagati ya milimetero 100 na 120 uretse mu kibaya cya imvura iri hagati ya milimetero 60 na 100.

Bugarama no mu majyaruguru ya Nyamasheke kimwe n’ahandi hose hasigaye hateganyijwe

Intara y’Amajyaruguru: Hateganyijwe imvura iri hagati ya milimetero 80 na 100 mu burengerazuba bwa Musanze na Burera. Mu majyepfo ya Rulindo na Gicumbi no mu gice cyo hagati muri Gakenke hateganyijwe imvura iri hagati ya milimetero 40 na 60, ahasigaye muri iyi Ntara hateganyijwe imvura iri hagati ya milimetero 60 na 80.



Ikarita ya 6: Iteganyagihe ry’imvura mu gice cya mbere cy’Ukuboza 2020.

3.2 Ibirebana n’imirimo y’ubuhinzi

Inzego z’ubuhinzi ziragirwa inama yo gutegura ibikoresho byifashishwa mu mirimo yo kuhira cyane cyane mu bice bikunze kugira imvura idahagije ndetse no kwita ku mihingire ibika amazi mu butaka. Muri iki gice cya mbere cy’Ukuboza ibihingwa byinshi bigeze mu gihe cyo kuzana indabo, imirimo izibandwaho cyane ni iyo kwita kuri ibyo bihingwa, bibagarirwa ndetse zirindwa n’ibindi byonnyi. Abahinzi barashishikarizwa gukomeza kugisha inama abashinzwe ubuhinzi babegereye mu gukomeza gutegura neza imirimo ijyanye n’ubuhinzi. Barashishikarizwa kandi kujya basura urubuga rwa Meteo Rwanda www.meteorwanda.gov.rw, cg guhamagara umurongo utishyurwa 6080.